

Incumbensa Bisculm Jörg concernent la meglieraziun dal provediment da las persunas ch'èn pertutgadas dad ME/CFS e da Long COVID en il chantun Grischun

Stimaziuns actualas partan dal fatg che ca. 60 000 persunas han ina encefalomieltis mialgica / in sindrom da fatigue cronic (ME/CFS) e che passa 300 000 persunas èn pertutgadas da Long COVID en Svizra. Quest dumber s'augmenta. La encefalomieltis mialgica u il sindrom da fatigue cronic è ina greva malsogna che pertutga plirs systems – tranter auter il sistem da la gnerva ed il sistem d'immunitad – e che chaschuna in grev impediment corporal. Bleras persunas pertutgadas pateschan d'in grev sindrom da fatigue, pia d'ina deblezza fisica, da tachicardia, da consternaziun, da sturnizi, d'infects da la via respiratorica, da dolurs dals muscels e da las giugadiras, da disturbis dal sien u da la concentraziun, per numnar mo intgins dals numerus sintoms. Characteristic èsi plinavant, ch'ils sintoms daventan durablamain e marcantamain pli fermes suenter paucs sforzs.

Fin l'onn 2023 han questas pazientas e quests pazients pudì contactar l'ura da consultaziun per Long COVID da l'Ospital chantunal, fin che tala è stada serrada d'in di sin l'auter, quai fin oz.

En in studi publitgà da la Charité Berlin (cunautura è prof. dr. med Carmen Scheibenbogen) èsi vegnì cumprovà, che ME/CFS vegn chaschunà – ultra d'auters virus – er da COVID-19. ME/CFS è schizunt la furma la pli nauscha da Long COVID. Tgi che patescha suenter 12 mais anc adina da sintoms, fa quai er anc suenter 24 mais. Ins sto partir dal fatg che las pazientas ed ils pazients da quests sindroms da Long COVID e da post vaccin (PVS, consequenzas da la vaccinaziun) survegnan ME/CFS.

Actualmain na datti ni tests validads per cumprovar u per excluder ME/CFS, Long COVID u PVS, ni ina terapia. Quai augmenta il privel da faussas diagnosas ed engrevgescha – malgrà gronds impediments – l'access a prestaziuns da la AI. Anc adina vegnan las persunas pertutgadas da ME/CFS sco er da Long COVID stigmatizadas e stuschadas en direcziun da malsognas psicosomaticas, er sche questa valitaziun n'è betg pli correcta tenor il pli nov stadi da perscrutaziun.

En ina interpellaziun en il Cussegl dals chantuns davart il tema ME/CFS ha il cusseglier dals chantuns Damian Müller (PLD) vulì savair dal Cussegl federal, co ch'el valiteschia la situaziun e co ch'il provediment per las persunas pertutgadas possia vegnir meglierà. En sia resposta ha il cusseglier federal Berset explitgà, che ME/CFS saja in tema impurtant e ch'i spetgia qua ina gronda sfida per la Svizra; a medem temp ha el renvià a la responsabladad dals chantuns (<https://www.parlament.ch/de/ratsbetrieb/suche-curia-vista/geschaeft?AffairId=20224006>).

La Regenza vegn incumbensada:

1. Da crear en collavuraziun cun ils posts spezialisads ina survista da la situaziun actuala da las persunas pertutgadas da ME/CFS, Long COVID e PVA e d'infurmar davart las purschidas da provediment concretas (centers da cumpetenzza, uras da consultaziun spezialas, ulteriurs posts da consultaziun) ch'i dat en il chantun Grischun respectivamain che mancan anc.
2. Da metter a disposiziun las resursas finanzialas e persunalas ch'èn necessarias per questas purschidas spezializadas, per ademplir l'intent – garantì tenor la Constituziun federala – che mintga persuna survegn la tgira necessaria per sia sanadad.
3. Da s'engaschar sin plaun naziunal (CDAS, CDS, COSAS e.u.v.) a favur da l'infurmaziun e da la renconuschienscha da la malsogna ME/CFS sco er a favur dal dretg legal da survegnir prestaziuns da la AI.

Cuira, ils 23 d'october 2024

Bisculm Jörg, Mani, Holzinger-Loretz, Atanes, Bachmann, Bardill, Baselgia, Biert, Bischof, Bleuler-Jenny, Cahenzli-Philipp, Degiacomi, Epp, Furger, Gansner, Gartmann-Albin, Gredig, Heini, Hoch, Kaiser, Kreiliger, Lehner, Maissen, Mazzetta, Michael (Donat), Müller, Nicolay (Bever), Pajic, Pfäffli, Preisig, Rettich, Ruckstuhl, Rusch Nigg, Rutishauser, Said Bucher, Spagnolatti, von Ballmoos, Walser, Wilhelm